

四百三十二峯草堂詩鈔

四百三十二峯草堂詩鈔卷第二

惠州 趙希璜 渭川

丙申

送曾應之南還

第一情深語將之送遠歸肝腸原久剖南北未曾違今我
學藏拙幾人同式微舊山書細讀且莫嘆知希
八年同力學風雨嘯唳聲湖上尋春去花中打槩迎望雲
思故里負笈後諸生珍重他鄉別難爲客子情

羅浮吾舊隱中有讀書堂泉響宜晴雨松風到晚涼爲除
塵壁堊應笑故人狂年月曾親誌逢仙授藥方

行人歸故國楓葉老秋山驛路來時熟馳驅此日閒長風

從北去侶雁護南還未遂終章志躊躇懶度關

七月一日與魚山季求應之遊陶然亭卽和魚山用

杜題終明府水樓韻二首兼寄金笛帆

冷然風引浦烟涼裊裊殘荷惜翠裳幾輩正來分爽氣危

欄高處墮空香追懷秋水人如玉同聽春鶯舌轉簧

時憶去年

同笛帆羅浮聽鶯極望鳳城紅日起觚稜光映漸臺方

天雞夜唱搏桑樹霞彩驚看迸海時蓬島周迴應不遠瑤

臺高聳尙尋茲變商幽律空中籟團露青林畫裏詩佳興

逢秋兼勝賞何須永日愛彈碁

送梁鏡林明經南歸

遊學歸歟學業成一琴一劍老儒生方憐我輩通經少又

在長安送客行海角天涯南北路白雲紅樹往來情
嗟鞍載去詩千首不許閒人問姓名

顏魯公名印詩

魯公之名千古峻公名印方不及寸日角騰精射寶奩烈
火炙油凝赤暈當時逆賊肆猖狂廿四獨聯河北郡開元
皇帝狀忠臣何如名嶽金天鎮九死直成百鍊鋼三朝枉
受羣奸刃名傳異代豈自必印守子孫殊足信古銅生綠
猩血紅寶光上燭從頭認從來天地浩然氣豈與尋常共
煨燼倉皇我憶段秀實還兵倒用司農印遙遙青史二千
年兩公名字誰堪近

雪後

積雪不肯掃恐亂冰鹽痕參差枯樹影委地輕烟存茫茫
西山上銀河湧新漲落日銜山腰天風吹不浪太華與我
眉萬古長如斯琉璃樓開十二面面揚清輝有友人如玉有
酒盈卮綠圍爐燕柏香詞聲出自屋

獨夜

獨夜不得寐天空涼月遙對茲寒徹骨使我意俱消雪影
一簾白風聲萬樹驕懷人憑短夢無夢更無聊

老僕

我辭鄉井入成均老僕夢夢只一人能事迺公騎欵段生
憎文字忤錢神故園自是多前輩此地空憐逐後塵午夜
梵音喧隔院逃禪差足悟前因

丁酉

題李畏吾舍人烏巖圖

陟岵復陟岵春雲繞春樹烏兮薄暮啼飛入蒼巖去慈親
宛倚門遊子宛行旅披圖我凜然喬梓仰與俯誰云鄉關
遙形聲通聽覩山下闢幽逕水邊起別墅倚檻來清風隔
林響柔櫓志在羲皇間先生心貌古行行田間人回首呼
小豎盤餐以遺親有餘還賜汝于今客萬里孺慕情如縷
極目矚層巒願傅南飛羽

壽蔡葛山尚書六十韻

元老

承平代尚書世壽堂神明裕嶠嶂矍鑠佐

成康坐理經綸事爭輝日月光安閒周李耳冲默漢張蒼
聖主崇樞部鴻臚重職方星看鶉火麗官以縉雲章密勿
敷戎政訐謨舉大綱六師明簡閱九法馭要荒掌總牲魚
進圖披地域詳堅貞匪石介果斷荆鐘鏗出納可喉舌威
儀燦珥璫

南郊親侍從北斗炫熒煌舊德堪爲範耆年罔不臧璫條
初插羽芝苑正延芳望羨高儲案名寧次太常銅樓翹輔
弼銀榜禮賢良陳物緣稽古酬庸說捧觴遺風迨正始清
選任官坊夏鶩勞揮闈春花賴贊勸遊非同綺季拜特重
王商久歷東三少何須智一囊振纓繼姚宋有道出巖皇
國子尊師氏儒宗列上庠四科勤博約五業剖微茫蹕別

無辭瘁酸鹹莫或遑及時遵蛾術數例仰門牆石鼓垂文
永槐枝再茁長辟雍觀矩度金馬肅冠裳講藝爨倫盛掄
材玉尺量魯齋真宿學梅叟豈詩狂瑞應符鱣集休宜紀
鶴翔端人朱服煥碩彥虎闈匡廿八奎文射三千弟子行
循循惟仿孔矯矯獨宗陽植遍桃偕李刪從莠與稂臯比
隆位置函丈設梯航精義如霞蔚摘詞似錦彰蒸髦分德
造特達是圭璋濂洛探原本生徒得就將青藜照芸閣綠
字映縑緇歸院然蓮炬聯吟效柏梁搜羅評甲乙翰墨發
琳琅

鰲掖榮彤管螭頭染

御香圖書藏柱下典故富長揚

秘省頻催詔瀛州早擅場鳴珂思蘊藉進綬憶賡颺霖雨
需宣布鹽梅待品嘗蟬盈侍中冕笏滿令公牀哲嗣呈天
驥賢孫器豫樟芝纔銜肅鹿珠愛捋癡羊太室叩封史蓬
萊沈侍郎曲歌飛絳雪詩咏擣元霜靈鳥瞻儀鳳仙音聽
鼓簧喬松蔥鬱鬱泰岳峙嶽嶽甘注盤間露芬凝澗底葛
馨宜增未艾馘穀熾而昌桃獻來金母侯封見子房壽山
綿紀算福海慶汪洋室有麻姑爪橋通紫帽岡

薇垣看異彩拱護

帝星旁

上余秋室先生

時先生分校十二房希
璜卷被薦得而後失

撤棘先傳報罷名敢同方叔受虛聲七千里外柄遲客博

一邯鄲夢未成

丁酉報罷南歸留別馮魚山

欲行不行傷我心
天涯能得幾知音
蘆溝曉月淒清色
偏使離愁結自今

萬里遄歸落第人
曾經三黜過來身
却憐倦眼西風裏
短柄驢鞭滿面塵

故人惟有魚山在
蕭寺相依似弟兄
誰使生離分去住
羅浮花鳥夢中情

儻遇羅浮葛稚川
定嗤骨俗受塵緣
他年共踏白雲客
纔是蓬萊第一仙

留別安桂甫

聚散信有數飄然歸故鄉貧猶琴劍在愁共海天長來客
新花樣征人舊雁行看他馬蹄疾得意氣偏揚

一別一萬里浮雲今古情交遊重元禮豪氣媿金城紅葉
西風下黃花落月橫明年歸海上啖棗憶先生

老將一首貽黃仲則卽以誌別

幾人鰲臂到三公百戰沙場未論功身隱瘕痕鵬羽箭架
騰寶氣鐵胎弓受知國士恩非淺曾讀陰符遇亦窮自是
長安多駿骨黃金臺上想高風

戊戌

西湖酒樓獨酌有懷馮魚山醉作長歌却寄

滿湖楊柳含春烟樓中歸客心悄然驚風駭浪忽然見此

夷猶澹蕩波萬頃如與故人千里百里拍肩挹袖相追還
去年醉花下狂嘯動四筵幾樹海棠紅欲滴一簾芳草綠
如茵故人爲我談名勝指畫湖山起清興約在湖邊住一
春披簑帶笠作漁人維舟青冥倚天之絕壁手馭紅輪迸
海之朝暾胡爲隻身賦歸去蕭蕭風雨西冷路憐君五載
客京華魂夢孤山處士家家有小童時放鶴日夕啣雲度
冥冥羽衣兩兩翠微邊閒情片片梅花落南高峯北高峯
飄飄上下凌春風我欲騎爾東海東遠訪蓬萊摘桃之王
母賣藥之壺公睥睨邱壑淨掃塵蒙吁嗟乎人生失意復
何美惟有湖山堪繾綣登樓歸計全茫茫新詩賦寄花間

鴈

西湖春權詞

湖光欲雨花冥冥一縷兩縷雲氣生
蘭橈搖入花深處雲中見出青蓮橫
玻璃瑩瑩度飛鷁寶鑑炯炯吞長鯨
懽呼合燕多雜沓清絲妙管時交鳴
雙漿蕩漾魚鬣短片帆蘊藉東風輕
小兒女子不曉事曳裾爭欲凌風行
環珮叮璫響空谷紅紫繚繞迷春城
把盞忽下長庚飲高譚恐使天吳驚
林梢已露新月色連環交紐何多情
移舟試傍南屏宿靜數百八疎鐘聲

借黃繩千劉秋魁聯騎遶湖歷淨慈龍井天竺雲林
諸刹

曉出清波門聯騎遶湖曲朝暎初散彩芳草已結綠湖光

霧未開山容歡可掬淨慈撞晨鐘闍黎膳早粥飢腸轉鹿
盧啖彼黃齏馥南山尋龍井北山拜天竺絕壁水淙淙倚
天峯矗矗小憩雲林寺有僧枯似木瞑目坐蒲團合掌除
煩惱空花來妙香寒玉敲巖竹攀籐上韜光湖心渺一粟
同行黃與劉胸懷皆卓犖撫松寄嘯傲陟險寧不子何以
身是仙祇緣骨不俗天風生我襟碧雲繞我足黃劉已大
醉狂言撼五嶽遵湖薄暮歸明月滿林麓回首望青山中
有人如玉

湖心亭春望

綠雲淺嫩烘晴日鏡裏佳人醉春色蘓隄花織彩虹高柳
浪鷺梭金線密櫓聲欸乃輕風送蔚藍皴起玻瓈縫水高

一尺一篙深撐入湖心春霧重

留別西湖

湖山不放旅人歸花颯清香柳拂衣從此夢魂顛倒處衣香留逐彩雲飛

欲別頻從鑑中照非緣面目認難真扁舟他日來歸隱記取今朝卽故人

落花

小鳥紛紛散輕風緩緩吹傷春十分意一半落花知

歲暮懷人

兄弟禪關久寄居

魚山贈行句

對牀風雨近何如深知窮達皆

由命不上侯門尺素書

馮魚山

平生酷愛李綱齋把酒百愁都可排去歲棄官同做屣忽

愁知己客天涯

李綱齋

多愁多慮會仲子恐怕光陰誤少年纔上公車疑廢學出

門三日又南旋

應之以丁酉新傳聞
公車北上中道而歸

楚國美人屈與朱秋潭桂浦愛譚詩淵源自有離騷在何

必西江第幾支

安桂甫彭秋潭

金粟公子富縹緲清才愛好顏大郎怕人竊書時閉戶于

今腹笥五車強

顏耘甫

愁煞海南病廣文寒氈一席爲誰分清癯常似怯衣重乘

舟便欲凌風雲

何崑南

莫向西家去效顰眼涵秋水足精神朝天鵠立仙班內父

手中書小舍人

溫步容

清溪作令三十日，喝道遊街纔兩回。近聞遠宦滇南去，白

髮蕭蕭入鬢萊

樞默齋

詩才清似梅歐陽，太華峯高白玉堂。情到深時受塵累，奔

波日爲友生忙

潘毅堂

髯翁貧病今猶昔，時欠長安賣藥錢。欲繼石倉闢儒藏，亂

書堆裏日安眠

周書倉

等閒賓客到門稀，分付東風爲掩扉。炬導蓮花紅雨盡，云

從天祿校書歸

蘓雲川

知交見面不相識，細審言談認友生。偏說眼能窺百步，綠

楊垂處是春城

劉然乙

牀頭無酒亦無錢，典衣買醉時灑然。狂言忽發曳屐走，踏

雪直上峩眉巔。

李墨莊

聞有離愁便斷魂，愛君情性實溫存。年來兩在揚州過，猶

守兒童車竺言。

顏問渠

採藥深山倦枕流，閒情一片白雲留。笑我出山姑舍是，會

經蓬島更何求。

鍾嘉會

酸辛盡托摸魚謠，却似蘓髯春夢婆。七十老翁攜幼子，可

憐萬里涉風波。

何松亭

毘陵七子誰第一，睥睨滄溟空結壇。羨煞神仙偶遊戲，飄

然賣賦入長安。

黃仲則

甘苦相依蕭寺裏，嚴寒呵凍手皮皴。那堪風雨蕭蕭夜，同

作南來報罷人 荆澹齋

濃眉大目多豪氣自信平生一諾難匣有龍泉騰寶耀月

中曾與故人看 尹丹崖

順菴和尙清且奇揮豪墨瀋時淋漓旋風未散霹靂走龍

蛇飛繞紛交馳 僧順菴

豐湖湖裏一明月豐湖湖外一青山醉來餌月釣山客不

到三更不肯還 黃凌甫

同學少年惟燮三課餘捫砌作茅菴大家剪紙摹花樣戲

賭一枝優鉢曇 左燮三

客中新繪烏巖圖曰歸不歸何躊躇應知捧檄娛親意卽

是龍溪李畏吾 李畏吾

門前日來長者車
宋子好客兼好書
對客攜書出門去
短袂揮秃尾驢

宋芝山

每到高歌風驟生
隔牆聽讀漢西京
荒郊夜半泣神鬼
古

調絲桐彈一聲

方輿行

嘔出心肝未肯休
沈郎消瘦不因愁
祇緣負下新詩債
珍

重重修黃鶴樓

黃致如

難忘增城荔子會
姚盧折簡日來邀
冰肌入口甜於蜜
大嚼不須愁腹枵

姚期遠盧得門

培植新花闢小園
利顛終日寂無言
詩文稿尾抄琴譜
案

上彎彎點指痕

利嘉會

門才純粹愛徐生
問難登堂矜躁平
常願功修兼日進
滿

天風雨誦絃聲

徐聖泉

我家小阮同玉樹
瑩瑩朗映庭階前
焚香最愛靜室坐
落葉滿地心茫然

姪午峯

四百三十二峯草堂詩鈔卷第三

惠州 趙希璜 涓川

戊戌

山居二首

和風欣遠集衆鳥交悲鳴攀松我長嘯招隱僧多情花落
不煩掃魚咬何知驚日夕悅我性多于遠公清

清流自環階白雲自生棟夢醒仙不來別我纔歸洞尺素
墨鮮新遺香暗浮動帶月步庭除恐沾花氣重

合江樓

東江日出騰白虹西江日落飛白龍渴飲銀山摧瓊海恍
疑鬪吼怒挾雷電而洶洶紹聖之元東坡子來寓朱樓酣

睡美雙江曲曲迴九迴千乘萬騎從空來天教此老吐奇
氣遠謫蠻荒洗芥蒂合離風雨久安排蓬勃烟雲先位置
丈夫得喜失何憂有酒須醉愁勿愁拯人當作屈伸臂處
世寧共蟬與螭癡仙人抱樸老眞契自結前生早豈但飽
喫惠州飯亦嘗分啖道華棗眉宇不使我見寒崢嶸想像
應同太白散髮騎長鯨披風榭中吟魂如若在高屐斗笠
何妨攜杖來江城梅花隔岸白于雪荔子雨中紅似血登
樓一望水茫茫萬古寒潮明明月

德有隣堂

白鶴高峯紫翠間時出片雲相往還柴門內有隱君子翟
秀才非鄧道人是音楚然不出戶落落難合誰爲隣東坡

難合復何如我聞有德德不孤南來萬里攜妻孥
舍全亡逋排之者誰章蔡徒中朝攻擊無完膚行道遲遲
走夔魑欲語不語語蟪蛄朋黨一論何可無彙征之頌風
騷餘通經趙德當追慕韓水韓山今鬱紆溪山處處皆可
廬君不見德有隣堂乎

思無邪齋

木棉榕杙何蕭蕭齋中有客心寂寥九泉自信根不曲
龍惟識乾六爻先生咏檜卽此意題齋偶爾揮霜毫思無
邪兮一言蔽毛詩三百刪修勞撮其要亦尊孔訓何論雅
頌同風騷硃池墨沼縈左右白鶴峯起江城腰蠻烟蜚雨
愁逐客况有虺蝮山魑號含沙射人不見影古木竟日啼

鳴鳴天地正氣自常在無以怵我乃真豪淋漓大字耀日
月煇煇炳炳鸞鳳巢始知屈賈徒抑鬱不聞不見何紛囂

白鶴峯東坡故居

縹緲疑是蓬萊宮浮水逆上雲溶溶千歲歸鶴誌丁令一
區托足同揚雄先生于茲號福地小山藉倚開屏風紫翠
之間虹橋跨江水以北帆檣通雞豚鷺鴨供一粲兒童父
老歡無窮人獲不沾瘴癘氣枸杞夜吠狐狸叢鑿井欲煩
貳師力疏畦聊娛鄰舍翁牀頭有罨挂落月鈞磯弄水磨
青銅于今相距六百載正如未覺春睡濃故居祠我子蘓
子星寒月白鳴疎鐘

松風亭

小亭起得傍東城，城城松吹夜半笙。
風景于今傳北宋，寒濤竟日咽唐庚。
落花黃滿無人埽，瘦葉青垂有鶴行。
忽化虬龍鬪雌霓，爪牙碧血看交橫。

寂寂山光月有聲，都于松下響蔥珩。
一池水浸琉璃碧，半畝陰同翡翠輕。
不放梅魂斜竹外，却留龍骨藉雲生。
何人酒醒夢初覺，追憶淮南涕泗橫。

惠州雜詩

十日黃雞五日豬，大家入市趁朝墟。
惠州飽飫東坡飯，風景難忘是故居。

樹邊小石祈年社，擊鼓吹螺賽伯公。
薰鼠若能供薦福，伯公當保一年豐。

合竹洲上桃李花合竹洲下楊盧家
清清潭水深千尺逆溯龍蔥十丈楂

扶留方勝包檳榔蜆灰少許浮青霜
唾出石華人不識試看廣袖舞昭陽

八月中秋打月姑月姑巧與十分無
輕搖穩步低頭拜生怕人呼女丈夫

採茶忙足一春忙焙茶茅屋生幽香
茶子不教人摘取苦心留與世間嘗

明月秋風蚤戶船珠孃十二已嬋娟
學歌先學凌波曲馬祖婆祠許愿虔

沿溪水碓盡春香香屑霏霏下碓岡
春到女兒魂欲斷幾

多辛苦爲人忙

種田好種種蚶田一椀蚶苗已十千不似賣魚春二月水
車車水九江船

竹葉符步叔明原韻

青虬夜半飛出匣口銜寶籙開雙頰歸來猶舞萬峯雲化
作龍紋蟠竹葉壇邊擣葯飄紅雪林中个个求賢切行書
寫就寄何人一片虛心弄明月風風雨雨頻相喚疑是齋
符元女伴可曾考召鬼神來不合青黥狄公面面上枯餘
孟生淚淚漬文成蚪蚪字莫誇有夢筆生花夢裏渾忘勅
勒使

除夕戲作

奔波亦覺太匆匆可柰儒生每路窮
記得殘年到安慶獨炊粉餅小船中

落落京華度歲除
氈嫌爐火煖屠蘓
寒衾坐擁不成寐
有客敲門借漢書

吳閭前此小勾留
一夜春風醉虎邱
燈火山塘紅七里
江邊明日又歸舟

今年置閨春偏早
家裏春光分外多
小閣支鐙喚兒女
膝前齊唱太平歌

巳亥

哭桂林司馬李南礪先生

大雅不可作風流
今在茲胡遽化異物
長騎天上箕癘痛

本鬼域身心寧危疑一旦罹其毒行路空嗟咨憎達與喜
過兩言良足悲

嗟乎水滔滔逝者如斯夫痛哭復何言痛君齋志殊所行
無一二已爲人唱喁東原又先死誰表君遺書

吾鄉馮

山魚與張

葯房君之唱和友去歲見葯房愁君病已久

今年魚山書謂君喪在柳南北兩懸絕我亦東西走手自
束生芻臨風酌杯酒

門才有胡生風流能自賞天不予以壽玉樹埋黃壤君少
許可人于胡獨推獎好友更誰歟蒼蒼復莽莽傷哉周書
倉自此今無兩

前身終南人誕生早足異一夢證因緣形與圖中類

南礪生之

前夕其尊人夢鍾旭
入室長而厥狀肖焉
炯炯澄星眸解面轉
斌媚瞢腹還于
愀口潤懸河似雄論
驚颺風嶺南號才吏
才如春蠶絲絲
盡遂自傲太息人浮
生原同泡影寄

睡起

涼枕松窗曉空亭山
氣清薰風解人意蘆
箔落花聲雲起
水沈閣日高蟬一鳴
十三絃共澀秦女學
擗箏

題金遠亭秋江泛月圖

秋水生白波秋月湧
金浪茫茫蘆花中漠
漠蕭森況與君
雲水別對月增惆悵
我僕僕風塵而目非
蓬閭今日披君
圖羨君心獨曠奚翅
隔仙凡魂夢勞相向
踏遍萬重山不
及滄江上

題周肅齋明府罌粟花圖

東風駘蕩嬌無力罌粟輕籠烟
難歷聞說雍陶萬里愁馬
前飽看怡顏色千紅萬紫何
紛紛花開花謝同浮雲安得
有花皆有粟一時饜飫思饑
人此花秀色眞可餐小罌時
粟憑君看畫師寫到千囊滿
供給詩人翰墨緣如何不作
藻繡衰如何不化羅浮蝶幾
經渲染彩雲流醞釀重臺紅
一捻

梨花夜月圖爲張葯房同年作

濛濛小院輕烟起月色一簾明
似水三更烟靜月斜西梨
花含睇東風裏東風吹散雪
皚皚無縫天衣玉女裁只恐
素娥還爾妬青鸞銜入廣寒來

庚子

劍池行贈豐城丞許二錫正

丈夫出門仗劍遊眼橫秋水風颺颺何羨龍泉太阿射斗
牛張華雷煥空矜望氣來搜求我到豐城訪許子偕我往
觀劍池水交遊合與傾肺肝磷磷一勺清牙齒厲齒淬舌
非人豪唾壺擊缺徒哆哆男兒胸中有何塊壘不平氣捐
軀冒險祇是輕鴻毛劍池頭前古獄阿附南風禍偏酷江
心躍去雙白龍金精竟不爲伊福知幾果斷能剗愁遲疑
莫決成包羞扶危定傾況已任高視濶步將誰俸未聞俯
仰存先見猶自雷同恃黨援羊車不灑後官鹽銅駝羞對
親臣面遺柘弓遺銀硯司馬郎君走下殿青衣行酒痛哭

時此劍緣何難濟變
斬蛟投壁仰高風
何必淋淋手刃讐
人胸醉把杯酒酌
明月小池春水今溶溶

舟次南昌冒雨登滕王閣有懷魚山

春風春雨浮江來
驚濤駭浪鳴輕雷
滕王閣上一迴首
故人家住魚山隈
憶從金臺下湓浦
銀河倒掛香爐開
飛雲幾縷蔽白日
褰衣直上捫蒼苔
是誰石壁鑿精舍
呦呦野鹿懸銅牌
清詩千里以餉我
如獲異寶珍玫瑰
今朝冒雨望彭蠡
但見水面雲峯堆
五老嗤我遠公笑
芥舟忘載蒲萄醅
又無門生伺左右
籃輿莫質空徘徊
遠遊羨君攜弱弟
對林風雨傾尊罍

雪後

日日江上行雪霽差可喜凍雀不避人爭啄篷窗紙
匡廬紫翠間香爐烟結蕊半夜向風開化作銀光紙

次江州述懷

二十日來殘臘去一千里外早春浮山堯木筏盡南路茅
店雞聲送北遊面目何堪對匡谷往還幾度過江州夢中
似馭雙輪蝶飛到冲虛訪舊儔

木蘭川

木蘭舟潯江頭風蕩蕩水悠悠佳人難再得桃葉空飄流
明月柳燕子樓二十五弦彈箜篌箜篌聲咽木蘭舟佳人
不在潯江頭

蘭溪

紉佩空嗟楚大夫幽蘭無主向誰輸
雨中香淚溪流水夜半芳魂泣女嬃

春風嶺用蘓文忠松風亭下梅花盛開韻

春風夢斷梅花村春風嶺上愁冰魂
我來黃州烟雨晦弦月初沈星斗昏
漢川門外望赤壁步到城西尋廢園
合得有堂勞繪雪豈必其戶東方溫
一月坐思周茂叔千秋金鑒同朝暎
老梅今爲閒者主青山自對先生門
歸卧舟中羽客到餉我玉屑霏清言
武昌西山纔咫尺好將芳夢銘窪尊

破額山

但得此心無罣礙何須破額向青山
香爐峯外慈雲塔惟

有春風自往還

舟中望武昌西山積雪步東坡原韻

孤舟遠載羅浮醅醉看香雪西山栽
傾囊盡放珠明蝶銜香夢醒松風梅
尋源溯流飲斲水登山小魯何崔嵬
茫茫大地化銀海纍纍珠貫成瑤臺
借問淨靜果何所胸中無物空氛埃
嵐光橫鑠寒溪水正如盛市浮漚堆
樊山是誰開廣燕渴虹下飲傾金甌
懽呼當日分鼎峙霸王事業荒城隈
胡牀莫謂興不淺斷碑剝蝕青生苔
飛雲蔽空黃鶴舉羣仙會宴瑤樓開
夜半樽桑浴紅日玉泉直瀉羊脂摧
遙憶磷峒洗粉垢吐節春筍賁輕雷
窪尊有銘未得覩左股作筏寧空來
頗攜豐湖蓀菜美扣舷歌莫離騷哀

陽羅阻風

一雨已半月舟行多順風那知石尤意來阻武昌東歷險
南人慣爲濤楚鬼雄刁刁何搏擊花浪打蘆篷

沔口

茫茫入望春如許竊笠簑衣飄細雨西塞漁人沔口歸滄
浪孺子歌且舞三閭大夫愁勿愁鼓吏徜徉鸚鵡洲如何
騷客留千恨盡在方城漢水頭

取雪水煮茶用東坡和蔣夔寄茶韻

水東自結先生緣兒童引綆坡井便雪堂昔赴玉堂召金
鑿曾啜頭綱鮮却從萬里棲白鶴孤峯鑿井開慧泉我辭
豐湖抵沔口璇源玉水窮方圓云胡一雨十五日雪花堆

阜冰盈川蕤童弩父何所用博士不敵錢公筵呼僮掬取
笑寒素胡羊乳酪空流涎爐煨活火雀舌卷黃金有碾誰
爲研卓錫古榕鬪新茗清明穀雨當來年追憶羅浮任登
陟飛雲採擷黃龍先羅浮茶以飛雲頂爲最黃龍洞次之而黃龍面南茶最早鐵橋直
上覓紫筍道人乞索常輸錢凡入山採茶必給數錢與本山道士名曰常輸解囊
蚨飛亦似蝶風吹仙去無交纏歸攜駱奴與轡片蟬膏蟹
眼牀頭煎扁舟落落絆行客滄江渺渺思前賢石巖薜劇
我莫辨撒鹽咏絮徒爭妍直須和凝重結社賦詩好寄西
山鐫

銅雀臺

凌雲起銅雀飛分香賣履事全非空憐疑塚七十二曾羨

周文天命歸銅雀飛仙掌折五馬同槽禍尤烈洛陽宮殿
草萋萋銅駝不復眠金闕

井陘關懷古

峯尖雉堞環天險井陘關不假兵三萬成禽水一灣誰知
高鳥盡生致左車還有德寧忘險良謀未可刪

黃金臺懷古

何以報東帝千金駿骨求馭賢原似馬有國恐忘讐他日
還書意當年厚澤留高臺芳草暮孝思共悠悠

四月八日偕胡十六秋篔遊法源寺不果招同安桂
甫酒家小集醉後復遊陶然亭步和秋篔原韻

乞食擬入舍衛城秋篔桂甫偕我行四月八日浴佛會千

二百五僧崢嶸一僧拈花發微笑一僧瞑目如含情一僧
拒門弗許入謂我之面留宿醒昔年我賃精舍住看花招
飲誰知名頗嫌比邱敬愛客蒲團延坐花茵平今年花好
不一到追撫今昔禪魔生聊藉酒家證淨業陶然風日相
澄清藤花小落松鼠過燦爛短垣開馬纓我亦微醺樂忘
倦同滌俗慮無交縈歸來還似夢初覺莫言舊事悲懼并
何所從來何所去去來自在良緣成

夜紡授經圖爲馮昭緒同年作

昭緒爲潛齋先生長孫
尊人齋庭早卒夜

紡授經爲
母氏作也

孤兒啼孤兒啼聲何淒其問兒何故啼長跪前致詞機聲
軋軋起中閨青鏡寂寂照空幃兒生不識父一經繩祖武

畫灰淚血春風寒
袞藥丸熊中夜苦
哀哀又廢柏舟詩
拱立如聞文伯語
皎皎明月光飛作
危樓霜上有離天
尺五之寶婺下有
悲歌引吭之鳴鳳
鳳凰雛棲高梧鳳
凰雛遊天衢遊天
衢貽我尺素書示
我授經圖云昔母
氏之勤劬而今倚
門復倚閭門閭光
大遊子心此心縷
縷同絲絰他年得
試經綸手好謝高
堂淚滿襟

滇撫署有優曇二樹花盛時顏靜山侍郎郵函索詩

賦此報之

淨土雖離飯福地一塵不隔玉波含
沾衣總覺紛紛墮冥坐先教色色參
花候重編新月令風中微笑老瞿曇
却于無住求其住靈鷲當前未易談

歡喜同聞優鉢曇維摩天女頌誦誦好知解語花間印未
許繡經葉上參蕭寺移來蓮座滿祇園瞥見月輪含何人
笑指蛺蝶處時啟雲僧慧劍函

四百三十二峯草堂詩鈔卷第四

惠州 趙希璜 涓川

庚子

題閔貞自畫奉饌圖

烏兮反哺啼烏兮爾父爾母巢南枝目爲爾翳翼爲爾垂
自朝至夕望爾歸烏兮反哺情何悲悲莫悲兮孝哉閔薦
饌奉牲雙淚隕形追刻木儼式憑技擅添豪心愈啗手攀
目揣求其眞世人繪貌難繪神胡爲茲圖聲容笑貌脗合
生紙上家人婦子肩隨左右趨庭進反而嘗嘗閔子爲我
言弱冠丁多艱伶丁孤立鮮弟昂丹青卒業爲專門今日
繪吾親明日繪吾親死者生兮亡者存寄形恂恍他人身

倏遇一老嫗翹首門前路宛若倚閭情見子還錯愕又有
一老翁覷之浴室中卒然道上呼乃公盡日相對誠慄慄
我不羨五鼎之祭旨且豐樹欲靜兮號淒風我不羨望雲
山下惆復恨人有子兮弗能養閔子反哺情閔子承歡形
披圖我凜凜况復人言罔問于家庭家庭之樂樂曷極我
有烏私時戚戚空悲抱憾到終天無君之手親顏色

題昆陵黃仲則傳印圖

仲則爲山谷裔孫新得山谷詩孫銅印于桂未谷江夏閔

貞爲作傳印圖

黃子眎我詩孫印上溯西江鼻祖之流韻如何支分派衍
門戶爭紛紜異代傳疑與傳信疑信合剖詩孫生天教此
印重崢嶸印印相傳昭世守亦如我家之壁歸連城山左

桂未谷雲烟生卷軸大篆小篆金石文許氏九千審其鶴
範銅摹刻秦漢章朱花綠繡交斑駁何人私印誇傳薪衣
鉢云從躡後塵莫笑杜陵分配享本來山谷有詩孫造化
鬼神同秘惜精光奪目猩紅色心印猶存替者誰眞傳勞
向風塵覓我友黃子氣吞五嶽凌滄洲丰神縹緲神仙儔
龜螭不得繫肘後黃金紫綬輕通侯竭來長安市上恣遨
遊涪翁孫子誰同流詩孫之印未谷贈商彛周鼎千年宗
物重向君家投隱隱懸針復垂露戔戔點畫疑奔赴陸離
光怪赤暈昏鶴頭蚊脚青雲附閔貞爲圖授受眞鼎鼎印
紙生精神羨子心源傳嫡派登樓我媿倚樓人

送山陰胡秋實下第之鹽山卽和其喜雨詩原韻

葛衿短袂人銷夏翩翩蜺裳還鶴駕微雲貼天澹銀河簷
牙星墮游暉夜笑非侯湛卹隱急却與趙嘏賦多暇旅店
貽我喜雨詩豁然似飲逍遙炙病渴頗思甘滑味難尋薑
桂而澆蔗君辭我作鹽仙行誰軒飛雲贈王榭忻忻雨後
翠樹鬱此去途中紅芰姹日下鞭敲秃尾驢酒家帘引征
鞍卸何必紛爭豎子名莫懟雲英猶未嫁杏林不得一枝
棲知待來年全樹借一旦置身黃金臺九方歎相十倍價
我生不解毀于人何事亦入困窮舍深拔鴻麗嘆僧虔韜
光潛實陽元射落落欲效捫蝨談處處逢人遭譴訝從前
百事祇隨緣如今對君還自詫學書學劍屢不成盡日野
田行穉穉舞翻碧浪玲瓏山歸歟盤土可以稼不然搗書

眠抱犢腹笥便便欺石架豈無觴醉同泛浮且喜肴藪正
芬藉勸君痛飲不識我我醉欲眠君乞罷厭聞猿鶴相悲
鳴試看簫管從天下仙人遠馭輜駟來皓首方瞳寧怯怕
胸中梨棗况先栽元津藉證紅泉瀉狡變能爲北溟魚滑
稽亦曉南山柘蕭蕭行李載詩囊牛禪脫向村姥貫心隨
斷梗感飄蓬手挽牛車相偃亞如何不聞蘭芷芳爲茆却
憂荃蕙化曾經奴隸蔡少霞君才真果凌鮑謝彈冠正幸
好乘時江湖休著烟霞樺

哭顏靜山侍郎五十韻

羅浮聳峙何巍巍左股夜失驚風雷蒼生且暮望霖雨
君王破格求賢才九連之下申及甫維嶽降神臺與萊篤

生我公作屏翰日南韶石爭光輝九齡姜子遇猶否我公
盛世勛名皆

帝曰滇黔汝往撫重臣出鎮封疆來方殷

宵旰之眷注大星遽隕東南隈憶昔起家自丞倅太原羣
以循良推三載報績上

天子銅符第一隆其階隼旟熊旗守泰岱聰明賢智興頌
頹二馮大小不足數果卿真卿如兩楷清白世守有家訓
之推上溯賢哉回東省轉輸選方面重邱坐鎮臨黃淮繼
時飢黎厪

帝念節相入告停征催我公賑卹倍慘淡千百萬衆忘膏
災驅使郡縣臂使指奔馳道路風生埃

東巡召對首稱旨西蜀廉問開霜臺陳情

丹陛

嘉大義江閩就近循南陔殊恩奇遇代所有烏鳴馬伏情
何衰版與公侍鄰粵嶠旬宜親奉椿萱偕

聖主曲體孝子志靈芝瑞向高堂開

公爲江右方伯署內生芝一本

久資

羊杜寄鎖鑰

恩膏屢渥疑慈闈數年牧伯怡色養重蒞江右迎春暉迨
其抱痛悲風木

綸言猶下詢通材適當梟獍互吞噬貪狼無厭狼引豺肆
其凶險阻聲教抗我師旅懷疑猜公衙

新命往轉運軍書旁午馳邊陲糧臺接續魚尾貫火輪電

掣磔門摧索橋雲棧形偃仰高崖大谷聲喧
歷美諾雍中
平次第運籌帷幄隨機宜

璽書遠勞日邊至孔翠

特賚蟬冠乖逆首游魂善反覆井蛙螳臂猶撐持摧枯拉
朽遂殄滅露布報捷馳紅旗論功行賞歸大將其次饋餉
無讐期建牙開府膺節鉞瀟湘雲夢明恩威縉雲擢掌鷁
火麗西曹樞省金章齋

寵遇日隆稱近密叅議大政鳴離嗜出納喉舌儼北斗柱
劉戴魏貞觀追如何牂牁與六詔雙旌重指雄藩移一朝
千古成永訣鳴空甲馬愁雲霾我與公家世媼媾嫁娶不
結高門楣長郎翩翩伯子壻射雀獲選乘龍兒我復絲蘿

與再締鳳雛佳倩同瓊瑰公時勗我以幼弟往來親串交
劇措詎意峩峩松千丈窮泉窅窅心爲灰素車白馬來執
紼隻雞絮酒澆愁懷豈公精爽上仙去日星河嶽魂相依
玉盃莫煮驚精汁典型竟共薰膏悲羅山浮山鍊橋斷合
離風雨誰安排棟梁折寧謝鯤慟天南重望墮崑隗

留別馮魚山太史

那堪潦倒老京華魂夢羅浮處士家炊熟黃精山月上霞
衣縹緲踏梅花

玉堂金馬位君身我逐浮名失我真拋却山中好風景青
山早已笑詩人

重陽日過楊柳青

楊柳青青二月天，幾多離恨爲人牽。
夢回靜海重陽節，夜下津門萬里船。
情韻蕭疎魂欲斷，風流體態我猶憐。
從今攀折秋波外，淨洗長隄一段烟。

重陽後食棗糕戲作

笑煞飢腸潤鮮膏，途中飽啗適相遭。
紅綾春負官廚餅，黃葉秋慚旅客糕。
未得染衣來祀柳，那堪落帽強登高。
疎籬藜藿家家醉，誰是詩僧與酒豪。

食蟹

無腸贏得聊充腹，且喜脂膏滑似油。
飲酒不妨輸吏部，持螯差足勝監州。
一筐肥羨尖臍滿，子盛言團臍之美，顏慍甫謂尖臍之肥勝于團臍。
九月霜教玉液浮，頓頓可能長飫爾。
憑子大嚼菊花秋。

含黃半殼饒鮮美風味家鄉牡礪油

牡礪肉以油煮之長而其味益鮮美

對杜康呼郭索莫將儉父笑中州

蔡謨渡江不識蚩虵

羊脂難抵瓊

酥膩紅玉輕披白雪浮廿載江南遊子夢蓬窗閒話稻田

秋

魚生

淺斟醇酒少加薑聶切魚生脆亦香漫道讀書能博物都
忘潑醋忽生光銀絲細似珍珠走蟬翼輕同霧縠張入粥
鮮還勝酥酪故園風味北來嘗

落葉

蕭蕭江岸蓼花秋吹起涼颺到小樓零落春紅憐去燕飄
搖征夢語盟鷗似歸金屋無門入爲隔珠簾向砌投珍重

移身茵褥上忍教題句付東流

蒼梧有恨說銷魂愁聽烏啼夜月昏哀共孤蟬吟漢武輕
隨一葦渡天孫凌空莫負風雲會落魄還沾雨露恩顧我
扁舟人萬里吳江楓冷兩三村

飛揚已厭爲情羈縱跡山涯復水涯尙可削圭封弱弟豈
同飄絮裊遊絲會矜樹影從人蔭更護花陰向日飾自是
苑枯饒定分不須惆悵怨芳時

擁篲柴門抱膝歌浮埃埽淨惜蹉跎亂霞渲染斜陽外短
笛淒清曲逕多秋意總歸王子賦湖光初起洞庭波昔人
感物猶如此擬向深山問爛柯

舟次東光縣顏惺甫祠部復以魚生見餉疊前韻二

首

適口調宜桂與薑，橙齏碎擣更生香。
秋歸南國鱸魚思，春暖蓬池學士光。
差免臨淵心竊羨，未能噴獺口徒張。
主人愛客情同嗜，十日舟中一再嘗。

何須幻覓蜀中薑，味別烹調分外香。
今日歸舸篋戴禮，他年飯祝記東光。
無魚充饌戲彈鋏，有鯉娛賓愧賦張。
極目津門思粵海，南旋甘苦幸分嘗。

場具詩十二首

號簾

光明一片簾，今日上風簷。
藉障文瀾濶，將身布袋淹。
差堪盟素志，原不礙高瞻。
破壁能飛去，銀河朗夜蟾。

號板

不是鐵門限還編千字文松杉裁白版高下附青雲莫笑
循牆納須知按號分天梯相接引階此冀升聞

號頂

屋漏亦何愧浮埃能蔽人安排疎網布依附四隅均華葢
憑空結慈雲灌頂新高懸雅垂蔭知道絕纖塵

柳筐

濟濟復蹌蹌磚門執懿筐指彈還係柳魚貫似求桑全賴
提攜力來親日月光包容歸國士何必計圓方

卷袋

卷懷良待售納約到如今昂首剛垂腹捫胸是奉心其中

思脫穎箇裏望投鍼名自縹囊溢珠光仔細尋

枕箱

一枕春秋夢搜羅入小箱粲從黃竹得味少黑甜嘗
同圓木雕函似肅將遊仙非是幻舉子總茫茫

試筆

長鎗與大劍烏足擬毛錐五色紛迷日三年銳進期
相寧驕食肉慧早代摘詞仙掌含花式凌雲一試之

試墨

傾盡金壺汁春成墨一圭施硃還轉手點漆已剗犀
此日邀衡鑑千秋任品題忍教堂下飲仍作客卿攜

試硯

請將銅雀瓦往奪鳳凰池
耒耜非勞力耕耘况及時
元雲飛鐵網冷面走金絲
却笑磨穿久龍蛇信筆隨

試燭

元鐙何處是扁院燭三條
座右風初入檠東影在搖
光華當復旦氣燄可干霄
轉憶寒窗下青青照永宵

銅圈

得意在囊中推移有化工
準繩隨左右規矩亦雷同
範我馳驅力憑誰鼓鑄功
防閑毋敢越輕按小闌紅

鎮紙

不作量才用依子汗漫遊
原能工壓卷亦可鎮疑猶
入殼今相假方人汝最優
端凝宜雅俗珍重洛陽投

自題梅夢圖

我不是濠上漆園吏蝴蝶飄飄寧遊戲我不是西湖放鶴
人梅花飽嚼清心魂家在羅浮山下住梅自成村蝶爲御
有時馭我隨風飛村中五色仙雲聚梅卽子兮蝶亦子何
必殷殷尋訪葛仙裾夢本幻兮子更幻何必昏昏醉卧梅
花畔我自識我真因自是前因把酒對明月明月照故人
翩翩仙子蛺蝶裙雙垂了鬢風中分不知彼是夢中我是
醒抑或彼醒我夢同此身但覺四時都是春兩山之氣交
氤氳綠衣歌未歇麻姑酒已陳明璫翠羽來崑崙瓊漿玉
液傾芳尊偶然墮落花下卧羣仙拍手霞衣翻趙子原來
續後塵羅浮那有梅花村請從今日賣酒田中藝梅千萬

一本任矇矓睡眼依稀髻鬢而醺醺

魯連臺

烈士惟殉名排紛一笑平義知周正朔功敵趙連城東海
君身蹈西秦帝號更何須逞雄辯抵掌取公卿

曉霧

晨起推篷思悄然迷濛冷霧鎖前川榆黃槐綠風中樹老
向秋波送客船

風帆一片薄蒼烟樓市依稀幻眼前倏起澹雲過小雨冰
綃段段估人船

感我飄蓬又一年生涯原似霧中船歸拚竹下開三徑來
往故人羊仲賢

眼鏡用查初白先生原韻

仰首重瞳日月圓
末光分得管窺天
六塵不染雙環裏
四目相閑漏影邊
撥霧空潭同刮膜
窮經皓首識連篇
漫誇毫髮無遺憾
記否與薪昧往年

躡躡跬步隔崇垣
習障當前亦太煩
乍覺波澄殘照影
不教花裊遠山痕
星懸冰鑑交離坎
漆點晶盤澈曉昏
縱使湘東羞半面
金鏡應謝涅槃恩

四百三十二峯草堂詩鈔卷第五

一
蘭
禪

惠州 趙希璜 渭川

庚子

歲寒雜感

去年借計來長風破萬里今年垂翅歸芳洲採蘭蒞人生
貴隨緣得意斯已耳布裘足禦寒脫粟可充餒廢園半畝
蔬山池尺二鯉撥火煨芋栗向日攜稚子穉子復何愁葛
懷吾與爾

西隣一片竹映我東齋綠對爾靜忘言有竹卽不俗新得
羽客方噉石如噉肉上山馳茅龍入市騎黃犢破弊鹿皮
冠頗稱幽人服

山禽銜枯枝戀戀谷口樹寧無繁華叢矢志不忘故繁華
能相移浮埃趨若鶩誰歟樊籠中一步一返顧

道旁有遺珍光芒埋草莽多少往來人蔑視等糞壤雲霄
失所依腐草亦競爽會當出沈沙羅入珊瑚網

東西兩山雲蜚蜚風霆奔本自無故合亦復無故分當其
初出時縷縷如可捫忽成蒼狗形又變吳牛蹲忘爲山中
物附麗趨鵬鯤如何千萬片銷沈寒江村餘者歸舊山百
無一二存

隣舟彈素琴遠山霏白雪古調和者稀玉顏惟自悅雖然
不諧人人亦不我絕留此聲色存千秋付明哲

庭前鵲營巢團團木末高何不虞巖危處危根本牢臨春

先揀樹未雨防飄搖安居亦豈易盡瘁非徒勞又擇野土
人童孺不我撓好音時一報以慰君無聊

吾鄉產丹砂合藥長生用丹砂果可覓長生應日衆一草
一木微動曰仙人種仙人誰見之百年如一夢吾自適吾
情藜藿供清俸仙藥任人求靈關總未洞待我闢靈關羣
仙欣侍從

遊子身上衣補綴經百手蓬勃蒙沙塵整冠則見肘未忍
遽棄捐舍垢依隨久細尋舊綫痕親人縫八九歸收弊笥
中終身莫相負

天下有心人俠氣足千古以身殉小名大節或未覩有慾
人得制多情徒自苦白楊蕭蕭風荒原一片土

良馬常苦瘦良士常苦貧同爲馭世物而不憚艱辛豈但
歷艱辛還受世所嗔鞭筮事陵躒驅走忘殷勤朝上羊腸
坂莫踏寒江濱誰知騰驥足便欲凌青雲向者鄙棄人笑
言來相親循還均苦樂顛倒撓狂昏

戲馬臺

古縣彭城治秋風戲馬臺非因遜將築早愧禮賢開讌賞
追劉氏悲歌憶楚垓如何重九會粉黛菊花杯

歌風臺懷古

泗水一亭長中原逐鹿回韓彭齊俎醢灌絳亦虺虺擊筑
初酣酒歌風代阜財誅鋤皆猛士此曲爲誰哀

燕子樓

春紅落盡小樓前十二闌干月悄然燕子空梁栖玳瑁尚
書在日惜翩翩人歸一枕烏衣夢我到長吟白傅篇底事
楊枝同此恨老來情緒更纏綿

芳名未肯累徐州樂府新翻雙淚流以色報人珠竟墮有
心戀主燕常留芭蕉小院三更雨畫閣湘簾一夜秋試鑑
盧家湖上影莫愁減得幾多愁

淮安感舊

生我鄉同父母邦鄉音尙未改淮腔鴻悲故國如賓至人
逐浮萍任水撞豈是普陀在南海翻憐童子拜西窗慈禱先
于普陀禪寺而生希璜綠槐陰下枚臯宅忍聽疎鐘對短
希璜童時多病而佞佛

釭

闌珊春色與情違，涵性西齋樹幾圍。廿五年中遺澤在，六

千里外舊人歸。

先人倅淮者廿五年始以資格右遷

飄零似燕尋門戶，存

沒憑誰問是非白髮吏胥談往事最傷心處轉依依。

蕭寺煢煢泣老尼酸辛劇向外孫悲。

外祖母中年而寡且無子爲族人逼嫁遂

落髮爲尼

母家一綫惟存我宿水孤墳却付誰立後遺言曾未

冷將身名路奈多岐也知再別難爲別貧病龍鐘八十垂

春風已逐浮雲散，汨灑荒原恨正長。

子師左問瀾先生已謝世廿年矣天

竟何言歸蕩蕩魂遊永夜總茫茫，徧遺楷植蒼山滿賸木。

感飛碧海將廿載痛猶門外立，惟憑數仞仰宮牆。

漂母祠

千金報漂母，百錢報南昌。等爲酬一飯，恩怨難相忘。功成

名亦立悲哉未與執爲德何不卒天下當已集

鬢社湖

小湖湖水蔚藍天月白風清淨晚烟古渡無人野梅放
一枝竹外跨門前

辛丑

擬五弄

天籟地籟和鳴中東風引出東王公東到樽桑東復東東
風噓噓春融融誰入青溪訪鬼谷羣仙競奏遊春曲香車
寶馬出瑤池清絲妙管迎朝旭

右遊春

食鳳卵飲甘露思美人兮不見步淥水而飛渡
菖蒲旌節

離離花深紅淺黛
道雲霞雲蒸霞蔚
瀾起沙從風便欲來
浮楂楂邪楂邪南
礪之南邪盈盈一水
天之涯溯洄何處
尋人家

右淶水

先生歸來歸谷中
說書二卷探諸胸
髮垂至膝容如童
後天而老仙之宗
仙之宗雲之宮六
六三十六宮官相
通春風無知破牢
籠闐闐雷鼓鳴靈
籟跳出混沌開洪
濛

右幽居

元雲合鳥路晦中
有猿啼同犬吠古
洞幽人坐相對流
泉聲瀉松風內仙
家住在白玉樓樓
下高巖天上頭不
見仙家惟坐愁

右坐愁

木葉飛兮有所思，泉聲咽兮迺在西。曲之西聽其刁刁，調
調衆竅爲虛者，恍與翩翩潺湲唱于唱，喁而和之蛟龍流。
涎崖谷喧唼唼，相於蕭颯。凄其我欲御風往，瑤池拜王
母。伏三尸出入緘毫之裏，綴金玉羽毛爲衣。又何必餌璫
漿，玉液鍊火棗交梨哉。

右秋思

摸魚謠

朝摸摸城東，晚摸摸城西。空心竹子織撈箕，潮平潮長高
復低。水痕一色山根齊。

朝摸安瀾門，晚摸海珠寺。魚戲芙蓉動，菱芰帶線牽。絲嬌

復媚只恐蓮心都是餌

朝摸不見魚晚摸不見魚魚飛飛去喂雅雛雅雛穀穀笑
爾愚無魚何苦枉搵辰

朝摸摸東洲晚摸摸西洲十里五里南江頭風淘浪湧空
悠悠月上彎彎又下鈎

朝摸尺二鯉晚摸尺二鯉問鯉同來何彼此剖出嶺南書
一紙無限相思生箇裏

朝摸歌復歌晚摸歌復歌蟹家生長逐風波波裏平安較
爾多那曾懊惱到魚簞

珠孃曲

蜃樓幻種是珠孃安穩風波葦一杭爭惜夜光龍戶集不

教掌上舞霓裳

綠篔簹垂笑語傳窗開瞥見估人船可能一斛酬身價買
得蛾眉措大憐

摸魚歌咽咽琵琶水調商聲泛月楂最是逃香春夢熟膩
人情意素馨花

曾從龍女學梳妝雲鬢風鬟嘆望洋解佩團團明月影照
人懷裏恨偏長

村居

村居絕少逢迎事一櫂扁舟理釣綸紅膾黃橙菰米飯江
鄉風味飽閒人

讀劍俠傳

少年任俠每多情俠到無情術始成却笑隱形非妙手萬
人叢裏取公卿

荆子空爲債事人報仇須識蒼君親喁喁徒洩不平氣輕
擲鴻毛激暴秦

最愛聰明聶隱娘感恩知己一時將依劉得遂平生願蜀
道貽丹示不忘

悔來紅線讀醫書金合偷將魏博餘半夜往還金萬命將
軍跋扈盡消除

鐙花

自煎膏火勢炎炎怒發心花奪夜蟾氣馥結來何以書光
芒射處不須占乍傳芳訊紅羅幕莫透疎風綠篔簹坐久

寒宵身倦後無端喜色溢眉尖

閒敲碁子綺窗前紅看鐙開並蒂蓮錯認蕊珠從冶化因
何金粟帶霞然麝煤香炷夸豪侈嬾婦油明喜管絃誤落
褚先生面上却留遺缺任人箋

遊豐湖尋蘓文忠遺蹟悵然有賦

幾家亭館翠琅玕占盡玻璃十頃寬太史真同牛馬走先
生曾當頰杭看遂教古寺餘香火隨意長隄理釣竿我覓
孤臣惶恐淚繞湖碑碣手親刊

憶羅浮

老人峯倚碧雲間笑爾終應物外閒十載離山猶故我待
完詩債便歸山

舟行

疊嶂冒水出行雲
飄月流循環
大逆旅天地小
浮漚未到源之極
焉知物所由
穆然而意遠
江上日歸舟

鴈

紅葉滿滄江
寥天鴈一雙
秋澄黃荇月
夢醒碧蘿窗
古渡片帆落
疎鐘何處撞
蟲聲還泣露
悽絕對殘缸

木棉花歌

天遣炎洲吐炎烈
始陽暄似夏時節
江頭紅光萬道掣
木棉千樹夜新裂
枝枝啼徹杜鵑死
精魂燄燄燒猩血
錯疑浴日升
榑桑又認珊瑚漾
春月蠻花蠻草粗
且豪不識嬌天事
容悅雄雞冠
戴強項令珠纓
寶珞薰卷髮
水中亦貌

胭脂染頰虬卵孕波心熱小園桃杏開次第獻媚含情任
桃達燭龍耀首顏渥丹正色相規我自別有時苞坼花作
絮憑空遊行雨化雪猶將衣被蒼生寒碾碎絳雲霏玉屑

新僕

新僕可人處晨昏依肘傍謂子猶父母承命後兒郎只此
意已足胡爲勞畢將多方事陵轍舉止轉茫茫
彼亦猶人子啣云吾亦云因噤小兒女莫倚舊家門驅走
藉其力腹心懷以恩還須憫愚賤加意爲溫存

秋夜

秋氣爽晴天銀河光耿耿萬籟寂無聲卷簾一鴈影
小步花陰立花露沾衣濕不覺月三更寒蛩當戶泣

枕上

枕上何所思夢中聊復爾得句疑夢中推枕披衣起

晚霞

青雲老去未光依得麗長天晚賜緋寄語烟嵐莫修飾好
憑本色御風飛

松濤

萬壑忽爭鳴淙淙松韻清不聞有流水竟日作濤聲鶴向
波中墮涼從樹杪生風雷時變駭宜雨更宜晴

祠陳寶

小兒走何怏怏小兒笑何听听化作雞鳴鼓翼而振振鳳
凰本與遊麒麟全瑞聖世君王仁陳寶飛入驪鳳羣陳寶

得祠王霸分霸得天下兼并紛虎狼吞噬氛祲氛曰不韋
曰美人野史誣蠲原無偷一炬燄燄詩書焚焚餘數世夸
傳聞相繼王舜五臣炎炎伯益之子孫豈其呂易羸之秦

築長城

築長城聖人生始皇帝沙邱行扶蘇太子來監兵入海徐
市談蓬瀛輶涼車璽書更趙高李斯交股肱亡秦二世三
戶并鹿化爲馬驅羣英狡兔走狗縱復橫控弦不在長城
鳴長城罷築咸陽傾赤帝仗劍誰東迎繫組霸上降子嬰
降子嬰約法輕收圖藉慎刑名

斬蛇劍

炎精騰騰水精缺卯金刀鑄龍蛇鐵精光直鼓芒碭雲天

地洪爐日星烈手提三尺殲三猾重瞳與暴異隆準老嫗
當道悲且號白帝金甌痛分裂可憐氣豪虹貫日未聞醉
戲刃揮雪高宗在昔征鬼方中興戡亂野人說上有古書
記年月秦之無道運轉捩乃公馬上敷武功指揮羣雄凜
寒冽七十餘戰輸一跌九華七綵寶燄掣靈金藏內春溶
溶驅風走霆悉怡悅

新豐市

大孝備寰寓寧大孝備宏漢京未央酒歡新豐市成寫放
豐沛儷佺輸名廣陌通衢畫棟飛甍狺狺犬吠粥粥雞聲
豈曰舍舊忘新門庭何必改作異地同情新莫新兮新豐
行人情未改地未更生產孰如仲所營嗚呼孝哉馮翼承

家天下爲親榮太上皇擁篲迎

奈若何

奈若何垓下歌漢軍是何楚人多楚人多虞兮泣三年遂
以五諸侯一炬咸陽紛六合六合紛爭鬪力何成大王氣
盡妾不聊生悲壯猶傳嗚咽嗚美人從我天下輕身狗美
人從我名死謝天下之歡騰至今惟說兵臨城魯國儒生
絃誦聲

人彘春

鴻鵠飛鴻鵠飛贈繳安所施爲我楚舞吾楚誦倚瑟擊筑
四皓當知之相連愛相連愛五色縷相羈競爲妖服趨良
時滅火疑若禍水迷豈其安劉必勃揆先幾轉忘人彘春

歌悲且莫悲且莫語燕爲猫雉爲鼠生生世世吞齧汝

赤松遊

美人招手雲中遊漢皇羈我食于留功名早已輕王侯秦
楚不共戴天仇一擊不中誰與謀屢陳兵法天以投傭然
遠引心志酬赤松之遊鴟夷舟何必方丈連瀛洲肩拍洪
崖挹浮邱我思漢庭第一流以仙爲解仙悠悠

舉第三子戲作

會原少湯餅飯豈作盤遊舊俗家相守黃雞粥滿甌誕彌
愛如達易長定同牛

今年建丑

賞識思溫嶠佳名好向求

深望露頭角翩翩勝父兄汝兄尙醇樸汝父誤聰明劣虎
優龍喻榷梨李柰情丈夫憐少子願繼舊家聲

壬寅

和黎二樵茂才初燕原韻

小語傍檐飛春風一度歸雙雙穿綠柳故故欵朱扉熟悉
迎襟禮新窺嫁女衣年年人面舊爲我報芳菲

再和二樵燕子入閨中原韻

裝非倭墮作雙丫紫燕依人撲鏡花故意差池尋仲氏幾
多冷煖問盧家剪開寶鼎香烟亂掠墜荆釵鬢影斜莫笑
投懷夢初覺紅絲一縷正相加

水碓

急流勇退似循環春到無人境自閒傍岸高低雲漠漠沿
山曲折水潺潺九牛莫競迴輪勢千杵何須買白還我種

玉粒三十畝從他旋轉問機關

雲髻山

千怪萬狀雲中浮素螺寶髻光華收或云白玉蟾此成丹
邱或云古生依栖霞壑中有藏書樓縱橫排界三百里倚
天半壁凌滄洲脉絡直貫珠明洞羅浮東走生浮漚合離
亦似任風雨茫茫海運聲颼颼徙去曉來失左股皇媯鍊
石勞接求美人招我雲中遊一寸一尺含嬌羞君不見三
楚悲咽冠沐猴又不見洗頭玉女明星眸突起烟嵐杳杳
冥冥蓬蓬勃勃迤邐澹岩而夷猶巍然巨鎮海盡天南頭
子規時復笑鷓鴣時復謳戲彼垂首飛禿鷲牧童樵父空
悠悠烏啼花落深山事何須傷春惆悵兼悲秋我愛春秋

有佳日躡屐攜酒探其幽醉後羣仙一聚會個子和汝雙
成留箏聲又過飛璫笛風掀髻墮霞衣握醒來却笑夢初
覺金釵十二一一排雲抽

豆棚

爲避炎蒸架豆棚春三二月預經營竹竿茅索檐邊出也
似籬笆一片橫

侵晨灌溉豆萌芽柔蔓牽連又作丫綠木尙愁風雨惡挹
他蔥翠過隣家

開愛當門紫白花摘煎活水品新茶醅醅翠莢山人饌土
飯塵羹莫妄誇

東首疎疎漏月光月光瑣碎豆花香先生懶赴羲皇夢自

有清涼作道場

老婢蓬頭堪應門
老奴辨水老崑崙
醉咀豆葉清腸胃
汲取山泉炊午殮

風味新奇董羹石
鱸錦襖笑人烹少
加菘子青青色是
我南中餽客情

山行

底須紅葉瀉紅泉
山上晴霞水面烟
攜杖扶身上山去
捷于乘馬與乘船

虹橋飛跨樹中間
山接溪雲雲接山
鳥道山風吹不斷
樹心長嘯壑賓閒

遠挑苦筍摘香椿
午饌晨飧味可人
私囑山僧芟野樹
當

門放出一峯新

萬壑沈沈百籟生
老松不與世人情
閒情到我同行脚
賺得山靈鼓吹迎